

NGA WHAKAPONO NUNUI O TE AO.

E tika ana kia whai-whakaaro tatou te iwi Maori ki te whakahau a te Karaiti "Haere kauwhautia te Rongopai ki nga wahi katoa o te ao."

Kei te pohehe te Maori ko te nuinga o nga iwi o te ao kua huri noatu ki te whakapono Karaitiana.

Tenei etahi whika hei maramatanga mo tatou ko te wahi whanui o te ao, kaore ano k'a huri noa, a kaore ano hoki kia rongonoa, i te whakaoranga i roto i a te Karaiti.

Te tokomaha o nga tangata o te ao katoa, me ki, 1470 miriona.

Kei nga Hahi Karaitiana katoa	...	...	415	..
Kei te whakapono o "Buddha" (Haina)	...	...	100	..
Kei te whakapono o Confucias (Haina)	...	...	400	..
Kei te whakapono o Hinduism (Inia)	...	...	200	..
Kei te whakapono o Mahometa	...	...	170	..

Ka kite ai tatou i roto i te 1470 miriona tangata o te ao katoa, e 415 miriona anake nga mea kua huri ki a te Karaiti hei Kai-whakaara mo ratou. Ko te wahi rahi rawa o te ao kei te kuare ki a te Karaiti.

Ka peheatia e tatou, e te wahanga Maori o te Hahi, te whakahau a to tatou Kapene, "Haere kauwhautia te rongopai ki nga wahi katoa o te ao." Ka rua mano nga tau o tenei kupu whakahau a te Ariki e takoto ana, a tae mai ki tenei wa e 415 miriona anake nga Karaitiana, a neke atu hoki i te 1,000 miriona nga iwi kaore ano kia huri mai ki te whakapono ki a te Karaiti.

Kei te ngoikore tatou te iwi Maori ki te kawe i te Rongopai o to tatou Ariki ki nga wahi kei roto i te pouritanga e noho ana. Engari ano i te wa i o tatou korona, i o tatou kuia e ora ana, i whai-whakaaro ano ratou. Ina hoki to ratou reo e mau nei i roto i te motini i paahitia i te Hinota tuatahi tonu o te Pihopatanga o Waiapu: te tau 1861:—

"Ki te whakaaro o tenei Hinota ko te mea tika tenei ma tatou; ka whiwhi nei tatou ki te Rongopai, kia puta hoki ta tatou koha ki te kawe atu i taua Rongopai ki nga iwi e noho ana i te pouri."

Ka 66 nga tau inaiane i tenei motini e takoto ana. Kei te manaaki ranei tatou i te reo o te hunga kua ngaro ki te po, kei te whakahaweatia ranei e tatou?

I te Hinota o te Pihopatanga o Waiapu i te tau ka taha nei, i whakaane nga Pariha Maori kia £210 te moni hei koha ma ratou mo te hora i te Rongopai, a wahia ana tenei moni ki runga i nga Atirikonatanga e toru, ara kia £70 hei koha ma ia Atirikonatanga. Kia kaha tatou ki te whakarite i te wahi wa tena, ma tena.